

Ran-u Burus u do'e udu **Afisa-ne**

Us-vuk

¹*Uno ran-o oon dugu-du Burus, wa-tom-u Yeso Kiristi remu cite mu u-Ru, udu net-tu u-hen i o u-me bo-u Afisa i ogogé yadu jab u-mé same-du ut-hi e u Kiristi Yeso ne.

²Um o us-toog udu u-Ru Uso-u in, u Wa-ko-uyan Yeso Kiristi ne, uzu wa ya' no u-nya u rus-du jab ne.

Ru-uyu'yar-tu nu-u so-o remu Yeso Kiristi

³Ut-vam udu u-Ru, Uso-u Uso-u in Yeso Kiristi, wu wa'e in nu-u so-o u ut-yar ne u koyuhé fun-ya u wa yuté in nu-u so-o tu rwuné dugu dom u-ru remu same-du ut-hi Kiristi ne.

⁴Remu wa dak in kanda wa nom dom u-ru u-dak ne, in shu'ut u-hen ne tumsu za ur-pyap u shu' wa. U-mé ut-cwan,

⁵Ru-ucunug in shu'ut ya'ag-u wa remu same-du ut-hi in u Kiristi Yeso ne remu cite-m wun u hog-du remer-m ne.

⁶Remu iya in nome u-Ru ut-vam remu nya-u m-sek u wa ya'e in m-hos remu Wa'-u wa wu' wa cwane.

⁷Ru-urwurug in u hyu-m Kiristi, remu same-du ut-hi in u Kiristi ne. In kwumug hodu ba'as-ut in. Kiristi nong iya remu u tat-u on-du u-Ru udu in.

⁸ Tumsu wa koske in nya-u wa u-tát. Tumsu wa wa'ag in shu'ut us-ver ne tumsu in nap ko-uyan go-tu ut-nom ut-beet.

⁹ Tumsu remu zu cikte u-Ru, wa kose in zong-su m-yasa su wa zonge ut-nom u remu dugu nom-tu Kiristi de ut-nom.

¹⁰ Nom-u Ru-u zonge ut-nom ya: Ba da-u teye, wa zongte wa haatun ko-uyan nom-o u dom-u uru u-dak ne ur-koto, udu faruk Kiristi.

¹¹ Tumsu remu zu in samge ut-hi u Kiristi ne, in kwumug ur-og dugu-du u-Ru, remu zu wa dak in dugu ur-takun, tumsu wa wa'ag ko-uyan nok hon-hon uka wa zongte ut-nom.

¹² Ru-u zongte uzu it Yahuda-ne i ba'e m-wa jab udu Kiristi dugu ur-takun, in haatun ut-vam m-sek ne udu u-Ru.

¹³ Tumsu no a-za-Yahuda-ne, remu same-du ut-hi u Kiristi ne, Ru-u yaag no Yar-u u-Hen, wu wa nomte estedu us-rem m-tumb ne. Na nong iya ba no hoge rem-su u-Ru su ut-nip, Rem-su m-Remer su ukur, da-u no ya'e jab udu Kiristi.

¹⁴ Ru-u yaag in Yar-u wa. Yar-u u-Hen o ooge og-du ur-takun du Ru-u do'e ya-du in. Da-u wa ya'u in Yar-u u-Hen, uno koske in uzu wa ya'u in nom-u wa nome in estedu us-rem. M-vaste wa do'e gwudu i ooge net-ut wa. Wa nong iya remu vam-tu sek-m wa.

Toog-us Burus

¹⁵ Remu iya, dugu da-u um hoge yadu jab-u no udu Wa-ko-uyan Yeso tumsu cwan-ut no ne remu net-tu u-Ru ut-beet,

¹⁶ Um yakke vam-du u-Ru u remu no da, da-u um bakse u no ne u-me toog-us ri.

17 Um o kon-du u-Ru u Wa-ko-uyan in Kiristi Yeso ne, Uso u m-sek, remu sege-du Yar-u u-hen wa ya' no us-ver u u-hyan ne, ko no napu wa uka dupke.

18 Um o us-kon udu u-Ru wa u-pus jab-us no ko no napu wadu jab du na fogte no, u ooge tat-u sek-m wun u wa zonge remu net-ut wa, i o og-ur rò.

19 Um o us-kon tumsu no nap seg-mu beb-du shin-mu u-Ru mu zege remu in i ya'e jab udu wun. Gandi shin-m mo o us-gan,

20 mo yunse Kiristi dugu m-mar, tumsu wa shugusse wun u-dom u pora-du du sek-mu u-Ru u kom-u us-cwa u-Ru u-dom u-ru

21 Uku Kiristi wa ooge ur-faruuk m-zeg kotohe yar-to tu o ur-faruuk. Tumsu wa otte dim-du zege koduhé dim-de u uno da-o m-ha da-u oone ne.

22 Ru-u yaag Kiristi faruuk-du ko-uyan tumsu wa wa'ag wun yu-shu u-domu ko-uyan, remu a-doru Yeso.

23 A-doru Yeso e ooge i Kiristi, Kiristi wa ya'u o ur-fat u-beet, wa dorte ko-uyan u-beet u hi-ur wa.

2

Ur-fat u-me Kiristi

1 Da-u dim no oog uka a-za Yahuda-ne remu ba'as-ut no u nom-ut yo-to no ne.

2 U ho-ut to no dorog fun-us yo-se su u-dak. No dorog wu ooge ur-faruuk u dom-u yar-tu m-mya tu net-tu hyente da. Wuna ooge u-yar u ooge da-o m-anank u-me jab-su net-tu gugme dorru u-Ru.

3 In beet Yahuda-ne tumsu in nongan ur-yu sham a-za Yahuda-ne, u dorru cwan-tu ut-baas in. In o nom-du nomu war-ut in u jab-us in ut-sa in nom.

Remu iya in wa'ag Ruu hog ryab-us in uka net-tu kuse i Ruu de nomu kwup-du us-rem.

⁴ Sedi on-du u-Ruu o u-tat, tumsu wa cwanug in sok.

⁵ Ko ba uzu in oog uka marimari ne remu ba'asu in, wa yaag in ur-fat da-uu wa yunse Kiristi dugu m-mar. No kwumug uukur remu nya-uu u-Ruu.

⁶ Remu same-du ut-hi in u Kiristi ne, Ruu yunuste in dugu m-mar ur-koto u Kiristi ne, remu in nom-ut ur-faruk ur-koto u Kiristi ne u dom u-ruu.

⁷ Ruu nong iya remu wa koste kowan da-uu de haan, tat-u nya-u wa u zatte ut-mugusse da, remu on-ur wa duu wa kose in, i ooge same-du ut-hi u Kiristi Yeso ne.

⁸ Remu nya-uu u-Ruu o wute no kum-ut uukur remu yadu jab, za remubeb-du hir-ur no o da. Hos-mo dugu-du u-Ruu.

⁹ Ruu ukurte no za remu nom-ut so-to tu no nome da, remu taas, wakun nom ut-uk da.

¹⁰ Ruu nomog in uka in otte. Tumsu wa nomog in remu same-du ut-hi in u Kiristi Yeso ne, remu nom-du ank-mu nom-ut so-to, nomu wa zonge in nom dugu ur-takun.

Yahuda-ne u a-za Yahuda-ne shu'ute us-gan remu Kiristi

¹¹ Remu iya baksun uzu na makut no a-za Yahuda-ne. Tumsu i foge hi-ur e a-ur-pes-ne, e o fag-du no a-za-ur-pes-ne, ko ba shu'ute uzu pes-du u-war de, du na nome kom-tu net.

¹² Hoto no oog m-ra u-Ru ne no oog za Kiristi, tumsu no oog uka ham-ut ne u-me a-u-dak-ne u Isra. No nak estedu us-rem suu Ruu nomu e da. No o ur-yu u uno dak-o za u-Ru tumsu za wadu jab.

13 Sedi da-o remu same-du ut-hi no u Kiristi Yeso ne, no oog m-ra u-Ru ne sedi da-o Ru-u muutun no ut-mor u Kiristi ne. Wa nong iya remu uzu no toste jab u-me nomu Kiristi shuse da-u hyu-m wa azge dugu war-u wa da-u wa mare u dom u-kan.

14 Um zuug iya remu Kiristi hi-ur wa rus-du jab-u in de. Wa samge Yahuda-ne u a-za Yahuda-ne uka net gan remu mar-m wa u-dom u-kan. Wa hast bor-tu Yahuda-ne ya hatun yu-ur yo-de de du mote Yahuda-ne u a-za Yahuda-ne.

15 Bor-ut Yahuda-ne o u-tat, sedi Kiristi haste to remu mar-m wa. Wa nong iya remu wa nomtu hi-ur wa net-ut po-to, e same ut-hi u wa ne. Tunto net-ut po-to to dame Yahuda-ne u a-za Yahuda-ne ur-koto, remu e nom-ut shu'ut-du m-yar.

16 Tumsu hen, Kiristi haste bor-ut Yahuda-ne remu wa hongusse Yahuda-ne u a-za Yahuda-ne udu u-Ru, e shu'ut net gan, u wa haste shu'ut-ur yo-de u tek u-Ru u net-ne u remu mar-m wa u dom u-kan.

17 Kiristi haan wa nom donse-du Rem-su m-Remer su rus-du jab udu no a-za Yahuda-ne i ooge m-ra dugu u-Ru tumsu rus-du jab ne udu Yahuda-ne i ooge ut-mor.

18 Remu dugu-du wun, in beet in kumte ur-ker du ha-mu kit-u u-Uso remu Yar-u u-Hen u-gan.

Be-du ur-shu'ut du Wa-ko-uyan

19 Remu iya da-o no a-za Yahuda-ne hamut-to no ooge da ko net-tu do da, sedi no a-u-dak-ne e ur-koto u net-tu u-Ru ne tumsu net-tu bu-u u-Ru.

20 In beet a-za Yahuda-ne u Yahuda-ne in o uka u-ma, u na maye u-dom ur-tak du a-tomu Yeso ne

u a-warry rem-su u-Ru ne. Tumsu taar-du takun-du u-ma Kiristi Yeso wa hi-ur wa.

²¹ Na samge in beet u-me same-du ut-hi u wun ne, uka na nomte u-ma remu in rogom in shu'ut bu-u u-hen us-toog be-du Wa-ko-uyan dote ur-yu.*

²² Tumsu u remu same-du ut-hi no a-za Yahuda-ne u Yahuda-ne u wun ne o na mite no, remu uzu no shu'ute uka be-du du ur-shu'ut du Yar-u u-Ru.

3

Ru-u rwutun nom-tu m-yasa wa m-zun

¹ U sin-se dorogse ne u jab, me, Burus um o nomu no us-toog, me wu oye wa-m-tok-u Kiristi Yeso u remu re-u u-shu no, a-za Yahuda-ne.

² Remu um nak za u-sakna uzu um oog um kabug uzu no nak, Ru-u yaag me no-mu nom-du ank-mu yu-du wa-tom-u Yeso, remu re-u u-shu no a-za Yahuda-ne.

³ Ru-u upuste me nomu wa zonge ut-nom m-yasa, uka um pantu no u takun-du ran-u uno.

⁴ Tumsu a no karunte nomu um panne, no ut-kere ut-nap uzu um nak m-zun nom-tu m-yasa tu Ru-u zonge ut-nom su mot-ut Kiristi.

⁵ Ru-u wargu net-tu cara-tu arke nom-u m-yasa u wa zonge ut-nom da. Sedi u da-o wa koske to remu Yar-u wa udu net-tu wa dage e shu'ut a-tomu Yeso u a-warry rem-su u-Ru ne.

⁶ Tumsu nom-u Ru-u zonge ut-nom u ya: a-za Yahuda-ne u Yahuda-ne, i ya'e jab-u rem-su m-remer ne, e onkte og-du ur-mat hon-hon dugu-du

* **2:21** Wata a-dor-ne e ooge bu-u u-hen us-toog u Wa-ko-uyan.

u-Ru. Tumsu, e o og-tu war-u u-gan, tumsu үrkoto, e hog remer-mu nomu Ru-u nomte estedu us-rem, remu same-du ut-hi e u Kiristi Yeso ne.

⁷ Um shu'ute tok-u ank-mu rem-su m-remer remu nya-u u-Ru ya'u me, үdu wa wutebeb-ur wa de um nom m-anu me ri.

⁸ Ko ba shu'ute zu me o ur-vaste u-me u tek-u net-tu u-Ru, Ru-u yu' me m-mo ank-m yat-mo. Wa dak me um shu'ut wa-warry Rem-su m-Rever үdu a-za Yahuda-ne, u mottu tat-u kwum-tu u-yar u e do'e ut-kwum үdu onk-u Kiristi.

⁹ Tumsu na dak me um ya m-zun үdu kowan u mottu nom-tu m-yasa tu Ru-u zonge ut-nom. Wuna nome ko-uyan tumsu wa yaksu nom-tu m-yasa tu wa zonge dugu ur-takun.

¹⁰ Nom-u wute Ru-u nom-ut tun-to nom-to ut-beet remu wa nomot a-doru Yeso ne wa koste tat-u nap-m wa, үdu ut-yar tu ooge ur-faruk u-dom uru.

¹¹ Uno o nom-u m-mommo u Ru-u zonge ut-nom, u wa shuse remu Kiristi Yeso Wa-ko-uyan in.

¹² U remu Kiristi tumsu u yadu jab-u in ne me wun, in ut-kere ut-haan za u-gyer tumsu jab gan u-shu u-Ru.

¹³ Um o kon-us no, a jab-u no get u remu swadu ur-kob u ri da. Um o swadu ur-kob remu no, u ooge re-u u-shu no.

Toog-us Burus remu Afisa-ne

¹⁴ Remu nom-ut to ut-beet, um he ut-jwun um nom us-toog үdu Uso.

¹⁵ Wuna wu koduhu ko-de du dom u-ru u-dak ne kumte du wa dim-de.

16 Um nong us-kon uzu me tat-u sek-m wun wa ya' no ur-beb dugu Yar-u u-hen jab-us no.

17 Sedi Kiristi ut-nom be-du ur-shu'ut u wa u-me u jab-us no uka no wute jab udu wa. Gurus no ut-rogom m-cwa me cwan-tu u-Ru tumsu u ship no ur-beb ne.

18 Um nong us-toog uzu no kum ur-beb, ur-koto u net-tu u-Ru ne ut-beet, no nap m-huk tumsu mwur ne m-ja ne tumsu u ra-du ka cwan-ut Kiristi otte remu in.

19 Tumsu um nong us-toog no nap cwan-ut Kiristi, tu zuge beeb-du nap-mu net, remu no shu'ut shuyi-shuyi m-te da-u no do'e onk-du shu-du u-Ru.

20 In ya' m-sek udu u-Ru, wu de kere nom-du ut-nom u-tat sok m-zeg nomu in kon ko dorog-us in. Tumsu wa nom iya uka beeb-ur wa du ooge m-an k u-me in.

21 Remu same-du ut-hi in u Kiristi Yeso ne, yage a-doru Yeso ne beet u ya' wun m-sek remu no m-mommo! U shu'ut iya!

4

Same ut-hi u u-war ne

1 Remu iya me, yu ooge wa ur-tage remu ank-mu Wa-ko-uyan, um o kon-us no, no i Ru-u dage no shu'ut net-ut wa, no nom tun-to nom-to: Dortsun fat-ut no uka net-tu u-Ru nomte.

2 U-da u-beet swuumsun hi-ur no u shu'ut u tor-mu jab ne. Shu'utun u gag-du jab ne tumsu no kab nwas-mu or-ut no ne u jab ut-cwan ne.

3 Nōmon uka no dote ut-kere no e' same-dū ut-hi no u rwuunē dugu-dū Yar-u u-Hen, udu shu'ut-dū m-yar u or-ut no ne.

4 No og-tu u-war u-gan to. Tumsu na samge no u u-Yar u-Hen u-gan, uka na fogte no u wadu jab u-gan da-u Ru-u dage in.

5 In otte Wa-ko-uyan u-gan, fun-yu yadu jab udu u-Ru u-gan, ut-yubusse m-bu u-gan.

6 In otte u-Ru u-gan, wa o Uso u-beet. Wa ooge faruk-dū ko-uyan, tumsu dom-ü ko-uyan, tumsu wa u-me ko-uyan.

7 Sedi Kiristi yaag in kowan u-nya, ka Kiristi zongte wa ya'.

8 Uka Rem-su u-Ru zutté,
 <<Da-ü wuŋ arke m-da dom u-ru
 wa kub ban-du ut-net i wa mase;

tumsu wa nomu net-ne m-hos.>>*

9 Da-ü rem-su u-Ru zuye, <<wa daag dom u-ru>> koske m-zun uzu, tumsu Kiristi cuzgun u-dak.

10 Net wu na zuye wa cuzgun u-dak tumsu wuna wu daye u ane jit u-dom u-ru, u be-du zege m-ja remu wa kostebeb-ur wa u kohene.

11 Kiristi yaag eken a-doru Yeso ne u-nya:
 eken ne, e shu'ut a-tomu Yeso,
 eken ne, shu'ut a-warru u Rem-su u-Ru,
 eken ne, shu'ut a-warru u Rem-su m-Remer,
 eken ne, shu'ut a e'-du a-doru Kiristi ne,
 tumsu eken ne, shu'ut a-ut-kose ne.

12 Kiristi nomog iya remu wa zongte net-tu u-Ru, remu ank-mu a-doru Yeso, remu na muut war-u Kiristi.

* **4:8** Gwat tumsu: SepV 68:18.

13 Uno ut-re u-shum-te dau in beet do'e ut-shu'ut
u same-du ut-hi ne u-me nomu in yute jab tumsu
nap-m in u mot-ut Wa'u-Ru ne. Se in do'e ut-shu'ut
sha-mu net wusete me u-Yar, m-te jamu na dote
ut-shu'ut uka Kiristi otte.

14 Se, in zamun ut-shu'ut ur-yu uka ya'ag-u rek-e da. A in ees na engusse in u kose-tu us-bi tu
ut-net da, sha-mu hat-u rek-ya yu mya-mu m-bu byurgusse. Ana nak jab-us in dugu net-tu us-ver i
zonge e engusse in udu warru us-bi e.

15 Sedi, udu donse-du nip-tu Remsu m-Remer
dugu jab ut-cwan, in do'e ut-rogom u koyuhé funya, remu in shu'ut sha-m Kiristi. Wuna ooge ur-hi
du a-doru Yeso.

16 Wun wa'ag u-war u-beet o same ur-be ur-gan
tumsu na shipus ur-koto. Koduhé og-du u-war
nomte mu wa ank-mo tumsu to sege tokon og-to
rogom, remu u-war u-beet o shu'ut m-yar ne
tumsu o nen u-me cwan-ut e remu or-ut e ne.

Fat-ur po-de u-me Kiristi

17 Remu iya, u beb-ur Wa-ko-uyan um o waru no
inyu: A no sur m-nom ur-yu uka a-za Yahuda-ne u-
me dorog-su m-zan e da.

18 Dorog-us un shuug u-cwum tumsu se mok-ut
dugu fat-du Ru-u yu'e, remu zu un nak u-Ru da
tumsu un gugumte erru rem-us wa.

19 E zatte m-e' da. E o ur-yu du shu'ut-du cwan-tu u-waru e tumsu un nom ko-uyan go-du nom-tu
us-gur to za mu-du u-dim.

20 Sedi, iya-o na iis-tu no u mot-ut Kiristi ne da.

21 Za u-sakna na wargu no mot-ut Kiristi tumsu
na iis-tu no mot-ut wun, remu zu na byuk-ut ut-nip
u-me Yeso.

22 Na iis-tu no, uzu no yage yu-du fun-yu ho-to no. Se no hoste u-tu u-war u no, u natuste u remu cwan-tu tu ut-enk.

23 Sedi yagun u Yar-u muut jab-us no u pose tumsu dorog-us no ne.

24 Tumsu wa-un war-u po-o uka no wyle cwu-tu m-wa. Uno war-u po-o na nom-ug o uka sha-mu u-Ru. Tumsu uno war-u po-o kose hi-ur wa u-me jab-u so-o u yu-du u-hen ne du rwuune dugu ut-nip.

Kose-tu fat-ur po-de

25 Remu iya, yagun warru us-bi. Sedi, kowan se wa war-u oru wa a-dor-ne ut-nip, remu in beet ogtu war-u Kiristi to.

26 <<Nomon us-ryab tumsu a no nom ut-ba'as ume ryab-us no da.>>[†] A no yage no cwa m-roog no o u-me us-ryab da.

27 Tumsu a no ya' faruk-u nom us-te ur-ker da.

28 Net wu nome u-hiw a-wa sur m-nom u-hiw da. Sedi yage wa nom m-anktumsu wa nom okon u so-o u kom-ut wa, ko wa kumu okon u wa do'e yadu i zatte da.

29 A no yage rem-su za so-se rwuun dugu nu-ut no da. Sedi no war nomu otte ur-sege ko eken ut-haan ut-mor u-Ru ne e kum nomu e ut-sa, ko ut-wa i ooge ut-er e kum shiriktin-mu jab.

30 A no naas jab-u Yar-u u-Hen u-Ru da. Wa ooge sha-mu us-nap udu no uzu Ru-u kabug no net-ut wa to no ooge, uzu dekuu ho-de Ru-u do'e ruutu no dugu ut-baas.

[†] **4:26 Gwat tumsu:** SepV 4:4.

³¹ Yagun no mot u gag-tu jab ne u kwut-mu jab ne u us-ryab ne, u namu jab ne u gom-tu u-har ne u nas ur-dim ne, u same u nom-ut yo-to ne ut-beet u jab-u yo-o ne.

³² Ba iya, shu'utun u jab-u so-o ne udu or-ut no ne. Hogon on-du or-ut no ne, u nome-du or-ut no ne ur-ho, uka Ru-u nomtu no ur-ho remu Kiristi.

5

Yu-du me m-zun

¹ Remu iya, doron sha-mu u-Ru u nomu no ut-nom u-beet remu zu no o ya'ag-u Ru-u tone.

² Yagun no u kowan u gwat or-u wa u is-ur so-de, uka Kiristi nomte in wa yaste hi-ur wa remu in sha-mu ya-du toog, u Ru-u hoge remer-m wa tumsu nom-u ut-kab udu u-Ru.

³ Sedi ana tan rem-su m-o da, ko dekun yu-du us-gur de u cwan-tu ur-hi ne u-me no. To nom-to dupke udu net-tu u-Ru da.

⁴ A no nom rem-su kob-du m-e da, remsu m-zan, u hor m-zan ne da, remu uzu se dupke na war se u tek-u no da. Sedi, no ya' ut-vam udu u-Ru.

⁵ No nap uzu wakun zaar wa-u-as, wa-za-u-hen, wa-cwan-tu ur-hi (wu ooge us-gan u wa nome-du ru-tu za ur-fat ut-huuk) wu do'e kwum-du dekun og-de u faruk-ur Kiristi u u-Ru ne da.

⁶ Remu iya, a no yagu wakun engusse no remsu m-zan da, remu, uzu go-du to ba'as-to ryab-su u-Ru haatun udu a-kob-du hog-mu us-rem ne.

⁷ Remu iya a no same ut-hi un ne u nom-tu un nome ne da.

⁸ Remu zu ho-to no nak nip-tu u-Ru da, uka i ooge u-cwum i nap^e nomu ooge m-gan u e da,

remu same-du ut-hi no u Wa-ko-uyan ne. Nomon
ur-yu uka i nape nip-tu u-Ru uka kumte e nom.

⁹ Remu zun-m mo mu ooge u-me no mo mut
nom-tu ooge tu so-to kyak, u u-hon hon ne, tumsu
u ut-nip ne.

¹⁰ Tumsu no mugusse ko-uyan no iis nomu cite
Wa-ko-uyan.

¹¹ A no same ut-hi u ank-mu m-zan mu u-cwum
ne da, sedi no rwutun to m-zun.

¹² Nom-tu m-e to na tan go-du nom-ut to, tu net-
ut yo-to nome m-yasa.

¹³ Sedi da-u na rwutun ut-nom ut-beet m-zun
do'e ut-kose ko wanne e un ooge.

¹⁴ Remu zun-mu wu' na hyen ko-uyan m-zun. Q
wa'e wakun zuut:
<<Zute, no ooge m-roog,
tumsu no yune dugu m-mar,
Tumsu Kiristi ut-mok u-domu no.>>

Ur-yu udu beb-du u-Yar

¹⁵ U remu iya shu'utun ga' sok uka no otte ur-yu.
A no nom ur-yu uka rag-ne da, sedi uka a-us-ver-
ne.

¹⁶ Nomon ank-mu da-u no uka dupte, remu zu
in o me da-u yo-o.

¹⁷ U remu iya a no shu'ut rag-ne da, sedi napun
nomu Wa-ko-uyan o ut-sa no nom.

¹⁸ A no yage u ke ho no da, remu uzu swa-u ke u-
tat u na-su fat-ut no. Sedi yagun u Yar u-Hen dor-ut
fat-ut no.

¹⁹ Uno ut-wa no huut ut-sep u udu or-ut no ne ut-
gom ne dugu me Ran-u u-Ru, u sep-tu ut-vam ne,
u sep-tu rwune dugu-du Yar-u u-hen ne. Huun ut-
sep tumsu ut-oni ne u-me jab-us no.

20 Tumsu u-da u-beet ya-un ut-vam udu u-Ru Uso u ko-uyan, remu same-du ut-hi in u Yeso Kiristi ne.

Neta-ne u campa-ne

21 Tumsu no yasu hi-ur no udu or-ut no ne u remu ut-fu'ubuse udu Kiristi.

22 No neta-tu ur-gu, yasun hi-ur no udu campa-ut no, uka no otte ut-nom udu Wa-ko-uyan.

23 Nomon iya remu zu campa ro wa ooge yushu ro, uka Kiristi otte hi-du a-doru Yeso ne beet. Kiristi wa ooge wu ukre a-doru wa ne beet i ooge sha-mu war-u wa.

24 Uka a-doru Yeso ne yute hi-ur e udu Kiristi, iya o neta-ne se e ya'aste hi-ur e udu campa-ut e u-me ko-uyan.

25 Kowuhé campa wa se wa cwanug neta wa tumsu wa got wa uka Kiristi tonté a-doru Yeso ne, tumsu wa mur u remu e.

26 Wa nomog iya remu wa ruute a-doru wa u kit. Wa nong iya udu jaas-du baas-ut in uka bu-mu jaaste m-jigin, da-u in hogé rem-su u-Ru.

27 Wa nong iya remu wa ya'aste a-doru Yeso ne udu hi-ur wa sha-mu gwup ur-gu wu so-wa. Wa ut-sa wa shu'ut u-hen ne, za ur-pyap, za tokon dakur-tu m-jigin to, ko tokon kaap-to.

28 Iya tumsu, kowuhé campa wa se wa gwak-ut neta wa uka wa tonté war-u wa. Wu cwané neta wa hi-ur wa de wa cwane.

29 Se wa nong iya remu zu wakun tamug gugmu war-u wa da, sedi wa regusse o tumsu wa got o uka Kiristi nomte remu a-doru Yeso ne.

30 Kiristi gwak-ut in u inya fun-ya remu zu in o sha-mu og-tu war-u wa to.

31 Uka Ran-u u-Ru zutte: <<Campa yage uso wa, u ino wa ne, wa same u neta wa ne, tumsu wa shu'ut sha-mu net gan u neta wa ne.>> *

32 Um nak uzu gom-ut tun-to kose-du m-sha de uka Kiristi u a-doru Yeso ne otte us-gan. Tun-to o nomtu m-yasa yat-to.

33 M-ha iyanę, kowan u-me no se wa gwak-ut neta wa ka wa cwunte hi-ur wa, tumsu neta se wa yaag campa wa m-zeg.

6

Ya'ag u uso-ut e ne

1 Ya'ag, doron i mate no, tumsu remu zu no ya'ag u-Ru no ooge, rem iya o kumge no nom.

2 <<Ya'an m-zeg udu uso no u ino-u no ne.>> Uno ooge bor-yu ur-takun u Ru-u ya'e yu otte estedu usrem ne:

3 A-bo ya'e uso ro u ino ro ne m-zeg, <<Nom-tu ut-nok hon-hon u remu ro, tumsu bo ut-kwum fatdu m-wur u-me u-dak.>> *

4 Ut-uso, a no wa ya'ag-u no nom us-ryab da u fun-yu no du'ute e. Sed i yunsun un ut-him ne u tumsu ut-bor ne tu rwune dugu-du Wa-ko-uyan.

Tok-ne u uso-tu u-bu ne

5 No tok-ne, doron uso-tu u-bu no i u-dak m-zeg ne, u-gyer ne. Tumsu u jab ut-nip ne, us-gan ka no nomte udu Kiristi.

6 Nomon iya za da-u e ooge gwat-du no u waro da, remu zu no ut-sa e vam no, sedi u jab-u no beet nomon nom-u Ru-u ooge ussa, sha-mu tok-ne Kiristi.

* **5:31** Gwat tumsu: Taku 2:24. * **6:3** Gwat tumsu: Rwuu 20:12; Muut 5:16.

7 Nōmon ank-mu m-tok-u no u jab-su ur-so ne,
uka uzu Wa-ko-uyan wa no ooge nomu us-pama,
za ut-net da.

8 No bakus uzu Wa-ko-uyan do'e yadu kowan du
wa ogde, ko tok-o wa ooge ko wa-u-bu, remu nom-
ut so-to tu wa nome.

9 Uso-tu u-bu, dortun tok-ne no us-gan, tumsu no
yage yadu e u-gyer. No bakus uzu no beet tok-u
Uso u-bu u-gan wa ooge u-dom u-ru. Wa koste m-
kuuk da.

*Cwu-tu m-gag tu
u-Ru ut-beet*

10 M-vaste, shu'utun ur-beb ne u remu beb-ur
yat-de du Wa-ko-uyan.

11 Gagun cwu-tu m-gag ut-beet tu Ru-u yu'e,
ko no ut-ker ur-ees ur-beb ne u gug-mu zong-su
faruk-u nom us-te.

12 Nōmon iya remu zu gag-m in za gug-mu huub-
ut yo-to tu ut-net to da. Sedi gag-m in u yar-ut yo-to
ne tu o ur-faruk tumsu e kose ur-beb, u gugum du
beb-ut yat-to dugu me uno dak-u u-cwum o, tumsu
gug-mu yar-ut yo-to ne tu dom u-ru.

13 Gagun cwu-tu m-gag ut-beet tu Ru-u yu'e, ko
no ut-ker ur-ees ur-beb ne u gug-mu yar-tu huub-
ut yo-to ro. Tumsu ba no nome ko-uyan ut-zong ne
no kere ur-ees u re-u ur-korro ne u gug-mu huub-u
yo-o.

14 Se no ees, ba no wa'e ut-nip sha-mu u-ho u
byun-u no tumsu no wa' jab-u so-o sha-mu cwu-tu
m-gag remu sok-u no.

15 Shipun Rem-su m-Remer ur-beb ne su haatun
rus-du jab u-Ru ne, uka karma-ne wute ut-ka'at
tumsu e ees ur-zwar ne u gug-mu huub-ut yo-to e.

16 Uda u-beet, ship yadu jab, sha-mu u-tum, u do'e ut-wa bo ker ruutu er-tu u-ra tu faruk-u nomu us-te ut-beet.

17 Kabun u-ukur uka top-du du u-kwam, u rem-su u-Ru ne su ooge sha-mu u-van u yar-u yu'e no.

18 Tumsu no nom us-toog us-kon ne u-da u-beet u dor-ut tu u-Yar u-hen ne. Remu iya no ees us-zong ne tumsu a no yage us-kon su sa-u sege-du u-Ru u remu net-tu u-Ru ut-beet da.

19 Tumsu nomon me us-toog, komo. Konon u-Ru o ya' me gom-tu kame um war za u-gyer ko me ut-ker ut-wa na nap zong-su m-yasa, su ooge Rem-su m-Remer.

20 Um o wa-u-gug, wu Ru-u tomne uka wa-tom, um haatun sin-se remsu m-remer se. Rem iya nomon us-toog ko me re u-shu ut-war za u-gyer u remu wun, uka dupte um war.

Vuk-su m-vaste

21 Me o tomnu Tikikus, or-u in wu in tone. Wu tok-u jab-u so-wa u Wa-ko-uyan wa, wu do'e waru no nomu um ooge ut-nom uka um otte m-da ne.

22 Um o tomnu wa ydu no u remu zu no nap uka it otte m-da, tumsu no kum shiriktin-mu jab.

23 Um nong us-toog uzu u-Ru Uso in u Wa-ko-uyan Yeso Kiristi ne ya' no beet a-dor-ne rus-du jab, tumsu ut-cwan ne, u yadu jab ne.

24 Nya-u u-Ru o ur-koto u i ooge cwan-tu Wa-ko-uyan Yeso Kiristi ne beet u cwan-tu za ur-ma ne.

ut-Mai'n Scripture portions ut-Ma'in: ut-Mai'n Scripture portions (Bible)

copyright © 2024 Wycliffe Bible Translators, Inc.

Language: (ut-Ma'in)

Contributor: SIL Nigeria

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

068e2e02-b155-577a-92af-01c24a39c8cc